



Inatsisartut aalajangiiffigisassaattut siunnersuutigineqarpoq Naalakkersuisut nalunaajaatigissagaat, suliffeqarfiit aningaasaqarnikkut suliaqartut pisisartuminnut neqeroorutigilissagaat, isumaqatigiissutit allattariarsuutitalinnik imallit, pisisartup suliffeqarfiullu akunnerminni isumaqatigiissutaat, kalaallisut suliarineqartalissasut.

(Inatsisartunut ilaasortaq Erik Jensen, Siumut)
(siullermeernera)

Siumup ilaasortaaitaanut Erik Jensenimut siunnersuuteqarneranut qujanaq, siunnersuuteqarnerata Demokraatit isumaannik annissinissamut peeriarfissimmagit.

Demokraatit pingaartittorujussuaat pisisartut illersorneqarnissaat. Allaganngorlugu isumaqatigiissuteqarfiusuni tamani pingaartuuvoq, pisisartup suliffeqarfiullu isumaqatigiissutit imarisaa paaseqatigiissutigilluarsimasimassagaat. Tamanna tunngavigalugu uagut isumaliortaatsitsinnut naapertuuppoq, innuttaasoq kalaallisuinnaq oqaaseqarpat, paasissutissat kalaallisut allanneqarnissaat.

Uani siunnersuummi siunnersuuteqartup kissaatigaa, nalunaajaasoqassasoq, tassani misissorneqassalluni aningaaseriveqarnermik suliallit sullitaminnut allakkatigut isumaqatigiissutit kalaallisut suliarineqarnissaannik neqerooruteqarnissaat. Demokraatiniit eqqumaffigeqqarput aningaaseriveqarnermik suliallit maani nunatsinni amerlanngereermata pitsaassasoq, taakku toqqaannartumik attaviginissaat ajornartorsiutillu annertussusia misissorlugu paasissutissiinermut aningaasarpasuit atunnginnerini.

Demokraatit isumaqarput, tamanna Inuussutissarsiornermut aatsitassanullu ataatsimiititaliamit suliarineqartariaqartoq. Taamaaliornikkut ataatsimiititaliap pitsaanerusumik nalilersinnaammagu, nalunaarusiornivik pisariaqarnerasoq.

Paasinnilluta siunnersuut Inuussutissarsiornermut aatsitassanullu ataatsimiititaliamut suliarisassanngorlugu ingerlateqqipparput.